

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 42/3

23 դեկտեմբերի 2016թ.

Քննարկվեց Ա/Ձ Արթուր Թադևոսյանի գանգատը ՀՀ ԿԱ ՊԵԿ Մաշտոցի ՀՏ 03.11.2016թ. թիվ 2134204 ակտի դեմ:

Ա/Ձ Արթուր Թադևոսյանի գանգատում բերված փաստարկները.

Ա/Ձ Արթուր Թադևոսյանը հայտնում է, որ 2015թ. հունվարի 1-ից Մաշտոցի ՀՏ է ներկայացրել սահմանված կարգի դիմում՝ գործունեությունը ժամանակավորապես դադարեցնելու վերաբերյալ, կապված առողջական խնդիրների հետ: Հայտնում է նաև, որ հաշվառված է ՀՀ առողջապահության նախարարության «Ավան հոգեկան առողջության կենտրոն» ՓԲԸ-ում (կցված է տեղեկանքը):

2016թ. հոկտեմբերի 7-ին թիվ 2134204 հանձնարարագրով կատարվել է հսկիչ-դրամարկղային մեքենաների կիրառման ճշտության ստուգում, իր հայրական տանը՝ Հ.Էմինի 30 հասցեում: Կազմվել է 03.11.2016թ. թիվ 2134204 ակտը, որում նշված տարածքն արհեստանոց չի հանդիսանում, քանի որ գանգատաբերն այդ հասցեում բնակվում է: Ինչ վերաբերվում է կանխիկ դրամով գնված ակվարիումին, ապա Ա/Ձ Արթուր Թադևոսյանը նշում է, որ պարզապես տվել է խորդանոցում գտնվող իր կողմից պատրաստված ակվարիումներից մեկը:

Ա/Ձ Արթուր Թադևոսյանը հայտնում է, որ ունի հոգեկան խնդիրներ և գտնվում է անօգնական վիճակում բժիշկների հսկողության տակ և չունի ֆինանսական միջոցներ այդ տուգանքը վճարելու համար:

Ելնելով վերոգրյալից՝ Ա/Ձ Արթուր Թադևոսյանը խնդրում է անվավեր ճանաչել ՀՀ ԿԱ ՊԵԿ Մաշտոցի ՀՏ 03.11.2016թ. թիվ 2134204 ակտը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև՝ Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ Մաշտոցի ՀՏ պետի 07.10.2016թ. թիվ 2134204 հանձնարարագրի համաձայն Ա/Ձ Արթուր Թադևոսյանի մոտ կատարվել է աշխատողի աշխատանքի ընդունումը ՀՀ օրենսդրությամբ սահմանված կարգով ձևակերպելու ճշտության (առանց գրավոր պայմանագրի (հրամանի) կնքման աշխատող պահելու դեպքերի բացահայտմանն ուղղված) և հսկիչ-դրամարկղային մեքենաների կիրառման ճշտության ստուգումներ: Արդյունքում կազմվել է ՀՀ ԿԱ ՊԵԿ Մաշտոցի ՀՏ 03.11.2016թ. թիվ 2134204 ակտը (այսուհետ նաև՝ Ակտ), որով լրացուցիչ վճարման է առաջադրվել 300.000 դրամ:

Ակտի 2-րդ կետով մասնավորապես արձանագրվել է, որ հարկային տեսուչ Հայկ Հովհաննիսյանի կողմից 11.10.2016թ. ժամը 11:20-ին ք.Երևան, Հ.Էմինի 30 հասցեում գտնվող արհեստանոցից կանխիկ դրամով կատարվել է գնում 4000 դրամի չափով՝ 1 հատ ակվարիում: Սակայն Ա/Ձ Արթուր Թադևոսյանը գումարը չի մուտքագրել ՀԴՄ և

համապատասխան գումարի ՀԴՄ կտրոն չի տրամադրել, քանի որ տվյալ հասցեում հսկիչ-դրամարկղային մեքենա տեղադրված չի եղել: Ստուգում իրականացնող անձինք ներկայացրել են ծառայողական վկայականները և ստուգման հանձնարարագիրը՝ ծանոթացման: Խախտվել են «Հսկիչ-դրամարկղային մեքենաների կիրառման մասին» ՀՀ օրենքի 4-րդ հոդվածի 1-ին կետի պահանջները, որի համար կիրառվել է նույն օրենքի 11-րդ հոդվածի 1-ին մասի 1-ին կետի բ) ենթակետով նախատեսված պատասխանատվությունը՝ գումարով 300.000 դրամ:

Ակտի ուսումնասիրությամբ Հանձնաժողովը եկավ եզրակացության, որ այն կազմված է ՀՀ օրենսդրության պահանջների խախտմամբ, հետևյալ պատճառաբանությամբ.

«Հսկիչ-դրամարկղային մեքենաների կիրառման մասին» ՀՀ օրենքի 4-րդ հոդվածի 1-ին կետի համաձայն՝ Հայաստանի Հանրապետության տարածքում անհատ ձեռնարկատերերի, նոտարների, փաստաբանական գործունեություն իրականացնողների (այսուհետ՝ անհատ ձեռնարկատեր) և կազմակերպությունների կողմից առևտրի օբյեկտների, առևտրի իրականացման վայրերում վաճառատեղերի միջոցով մանրածախ վաճառք իրականացնելիս կամ բնակչությանը ծառայություններ մատուցելիս կանխիկ դրամով կամ պլաստիկ քարտերի միջոցով իրականացվող դրամական հաշվարկների բոլոր դեպքերում (ներառյալ՝ կանխավճարները) հսկիչ-դրամարկղային մեքենաների կիրառումը պարտադիր է:

Առևտրի օբյեկտի և առևտրի իրականացման վայրի վաճառատեղի սահմանումները տրված են «Առևտրի և ծառայությունների մասին» ՀՀ օրենքով: Նշված օրենքի 2-րդ հոդվածի համաձայն առևտրի օբյեկտը դա գույքային համալիրն է (հողամաս, շենք, կառույց), որն օգտագործվում է ապրանքների առուվաճառքի համար, իսկ առևտրի իրականացման վայրի վաճառատեղը, դա առուվաճառքի պայմանագրով գործարքներ կատարելու համար օգտագործվող տեղն է:

Ակտի 2-րդ կետում նշված է, ք.Երևան, Հ.Էմինի 30 հասցեում գտնվող արհեստանոցից կատարվել է 4000 դրամի չափով գնում: Սակայն քննարկման ընթացքում պարզվեց, որ նշված հասցեում գտնվող արհեստանոցը շահագործվում է ոչ թե Ա/Ձ Արթուր Թադևոսյանի, այլ նրա եղբոր կողմից:

Ինչ վերաբերվում է Ա/Ձ Արթուր Թադևոսյանի կողմից ստուգման ընթացքում վաճառված ակվարիումին, ապա այն իրականում վաճառվել է Հ.Էմինի 30 հասցեում գտնվող տան նկուղից, որը վերոգրյալ իրավանորմով սահմանված առևտրի օբյեկտի չափանիշներին չի բավարարել: Այսինքն՝ կատարված գործարքի մասով հսկիչ-դրամարկղային մեքենա կիրառելու և ՀԴՄ կտրոն տրամադրելու պարտականություն Ա/Ձ Արթուր Թադևոսյանը չի կրել:

Բացի այդ, «Հայաստանի Հանրապետությունում ստուգումների կազմակերպման և անցկացման մասին» ՀՀ օրենքի 6-րդ հոդվածի 1-ին մասի համաձայն՝ տնտեսավարող սուբյեկտի ղեկավարի կամ նրան փոխարինող պաշտոնատար անձի կողմից առարկություններ չներկայացվելու դեպքում ստուգող մարմինը կազմում է ակտը և դրա մեկ օրինակը՝ ստորագրված ստուգում իրականացնող պաշտոնատար անձի կողմից, ժամկետի ավարտից հետո՝ 3 աշխատանքային օրվա ընթացքում, պատշաճ ձևով (առձեռն կամ փոստով) ներկայացնում տնտեսավարող սուբյեկտի ղեկավարին կամ նրան փոխարինող պաշտոնատար անձին:

Քննարկվող դեպքում ՀՀ ԿԱ ՊԵԿ Մաշտոցի ՀՏ պետի 07.10.2016թ. թիվ 2134204 հանձնարարագրում առկա տվյալների, ինչպես նաև Ակտում կատարված

համապատասխան գրառումների համաձայն ստուգումը փաստացի կատարվել է Մաշտոցի ՀՏ թվով 4 պաշտոնատար անձանց կողմից, սակայն Ակտը ստորագրել են միայն երեքը:

Ելնելով վերոգրյալից և ղեկավարվելով «Վարչարարության հիմունքների և վարչական վարույթի մասին» ՀՀ օրենքի 63-րդ հոդվածի 1-ին մասի ա) կետի դրույթներով Հանձնաժողովը գտնում է, որ գանգատը ենթակա է բավարարման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

Անվավեր ճանաչել ՀՀ ԿԱ ՊԵԿ Մաշտոցի ՀՏ 03.11.2016թ. թիվ 2134204 ակտը:

Հանձնաժողովի նախագահ՝



Վ.ՄԻՐՈՒՄՅԱՆ